

ւորն միայն զԱյրն բաժանորդ ասաց, իսկ Հայք տիրեցին միոյ մասին եկեղեցւոյն. բայց 'ի մերձ ժամանակի ըստ զօրութեան հրովարտակին, սրով առաք զայն 'ի ձեռաց Լատինաց, արտաքօսեմք նաեւ անտի զՀայս. զայս և Դատաւորն ծանուցանէր ծածկապէս լուեալ 'ի գլխաւորացն Յունաց: Զայստսիկ գրէ Թէոդորոս 'ի Կոստանդինուպօլիս և պատուիրէ արթուն լինիլ, եւ եթէ հնար իցէ առնուլ նոր հրովարտակ. զի յերկաթեայ դրանէ մինչեւ ցԱյրն լինել բաժանորդ, որպէս գրի յերկրորդ հրովարտակին: Յոյնք յառաջագոյն զարդարեալ էին կանթեղօք զսեւազարդ դաւիթն եկեղեցւոյն եւ 'ի ժամանակս բաժանորդութեան Դատաւորն ոչ եթող Հայոց կախել կանթեղս և վարագոյրս հաւասար Յունաց, որով այժմ բռնացեալ արդելին նաեւ զկանթեղն 'ի վերայ դրան վանաց:

Զկնի մեկնելոյ Նուրի էֆէնտեայ յերուսաղէմէ, բըռնացան այլազգիք 'ի վերայ Հայոց և պահանջէին 'ի նոցանէ զգումարս դրամոց, որոց պարագլուխ էր դռնապանն Ս. Յարութեան, որպէս թէ զնոյն տաճար ինքեանք շնորհեալ են Հայոց, և յայտնապէս ասէին. թէպէտեւ Թագաւորն ետ ձեզ հրովարտակ, սակայն Տէր երկրին մեք եմք: Զայս ամենայն դրեալ ծանոց Թէոդորոս առ գլխաւորս ազգին 'ի Կոստանդինուպօլիս, և խնդրէր դտանել հնարս ազատութեան. զի եթէ ասէ գիտէաք թէ ոչ բարկանայ Տէրութիւնն և չարգելուն զմեզ փոխատուք, թողեալ զամենայն 'ի բաց ելանէաք աստի, ('ի 24 Յունվարի): Փոխանորդ Պօղոս վարդապետն ըմբռնեալ 'ի ժանտախտէ՝ ազատեցաւ 'ի ձեռն դարմանի բժշկաց:

Հայք 'ի սկզբան անդ ոչ կամեցան թշնամանալ նաեւ ընդ Լատինս, և լուեցին յորժամ ընդդէմ կացին նոքա 'ի կախել զմի կանթեղ 'ի վերայ աստիճանաց հիւսիսային դրան Այրին, և տեղի ետուն քրտմնջանաց նոցին վասն պատարագին, եւ եղին պայման կատարել զայն զկնի նոցին առանց խռովութեան: Եւ ոչ կամէին ցրտանալ 'ի բարեկամութենէ, զոր ունէին յառուրց անտի այրելոյ Ս. Յարութեան. նոքա եւս վշտացեալ էին 'ի Յունաց վասն բազմադիմի վնասուցն զոր կրեցին. զի 'ի շինութեան տաճարին այլայլեցին զձեւ Գերեզմանին, և խափանեցին զպա-